

卷一

崑崙山房詩集殘稿

淄川 張篤慶 歷友

七言近體

贈署篆董邑侯 戊寅

姑射神君第一流
遙來攝篆向淄州
雙鳧雲路飛花雨
一鶴琴堂對素秋
到處黃童尊召父
由來竹馬識賢侯

御屏姓字題名久
早挽徵車擁八騶

挽嶧縣李烈婦 烈婦邳州人嶧縣明經李應芳側室年二十七殉夫矢節

隴西門第古蘭陵
氣節如霜衆所稱
鳧嶧諸峰增烈烈
滄浪一水倍澄澄
清風黃鵠凌霄漢
明月梅花結暗冰

翹首南天應下拜
峩峩千丈嶽雲崩

絡秀無兒暗自驚
拚將七尺荅平生
雙鸞豈復留孤影

一死何辭入九京
夢斷若敖應有恨
魂隨伯道共吞聲

下邳橋下流東水
嗚咽千年怨未平

靈颺雲路散歲蕤
碧血丹心振古悲
恨逐玉棺翔鶴馭

神飛翠羽照金支
勞魂零落靡蕪草
冰雪深埋桂樹枝

三尺孤墳依嶧首
從今烈烈映秦碑

前身端合是湘娥
鳳返丹山萎玉禾
擁節諸天朝上帝

啣哀一老哭西河
歸真靈嶽飛雲疾
撒手滄溟灑氣多

我欲問天天不語
斯人苦節竟如何

第四句指其父

寄懷畢劍津

十首

故人雲散歟經春
老病頻年夢裏身
誰道安豐巖下電

我言畢卓酒中人
豪遊時過黃泥坂
愛客能過白苧巾

苦憶北堂相對處
一池秋水碧粼粼

不見當時邊孝先
錦裘珠履腹便便
少年曾愛金錢埒

老去時參貝葉編
策杖尋幽山寺側
課農坦步遣峰巔

何當重續清遊跡
萬樹桃花踏亂烟

年來逸興寄滄洲
獨抱青霞卧一丘
移石堦前方矗矗

觀魚池上自悠悠
裏糧未陟金山麓
把釣遙思溜水頭

五鬣松脂三尺鶴
華陽新築幾層樓

燃薪館裏蕙蘭叢家有藏書未是窮玉跋金題標畫史
騷人墨客垂筒迂疏笑我朱公叔濟勝多君許侍中

回首草堂三尺地也宜花月也宜風

劍津齋中有也宜草堂

別來塵夢久勞勞憶在清齋醉老饜揮麈座中惟我輩
捉刀牀畔亦人豪喜爲次道傾家釀每對劉伶劈巨螯
安得金山同選石與君長嘯碧天高

昨日雙魚下錦瀾鐵山西望路漫漫一時獨步推文度
百里相思憶呂安北海樽前誰對酒南皮宴罷爾登壇
遙知古屋梅花月悵悵懷人正歲闌

風流染翰少年場驛路從來羨鄭莊紗緘門生書作癖

青州從事醉爲鄉李邕每自鐫金石唐述由來積縹緗
我續袁宏名士傳如君清譽總難忘

端居多病對秋旻常憶高齋坐夜分與我周旋寧作我
愛君豪宕每思君仲將墨在光如漆逸少書來氣似雲
三載不堪懷遠道西風搖落久離群

寥落何緣托雁臣難從尺帛見情親入中叔夜方堪羨
皮裏陽秋未是真瀛海求仙疑有路談天炙轂浩無垠
清流領袖如君少稷下錚錚更幾人

常憶中秋入夢頻華堂綠樹映莎茵金樽漉酒詩千首
玉露無聲月一輪清景只應天上有高吟豈是世中人

別來歲月如流電命駕迢遙亦愴神

贈畢公權令嗣器先崑郎

五首

名父文章久擅場齊名當日少班揚封胡過末多群從
法護僧彌繼雁行渥澤神駒騰逸步丹山鳳羽復廻翔
老夫忝竊稱前輩期爾凌雲入建章

謝家庭院蕙蘭畦寶樹森森拂檻低彩筆傳家探玉海
青雲有路接丹梯人如第五齊驃騎譽擅無雙食駉驄
憐我蕭條慚父執回頭舊恨轉悽悽

聞笛山陽痛阮嵇舊遊寥落意淒迷家傳棨戟稱遠左
人道阿巢似鎮西苦憶璧人埋玉樹尙留遺韻散虹霓

嗟余後死蹉跎甚又序三都走赫蹏

余爲公權序其遺詩

憶昔交遊數十春星飛雲散總成塵當時玉帛矜壇坫
今日蘿衣半隱淪手撫遺文悲屈宋相過子弟憶陳荀
君家大有靈馨在疊疊清言來逼人

黃墟十載起悲風渺渺山河憶若翁知己縱然無叔夜
清談猶幸有王戎當時藝苑聲華歇兩世交情涕淚中
泉下故人應首肯童烏端可繼揚雄

贈美林大士

師好遊能詩工八分書

曹溪誰與叩宗雷法眼相傳莫浪猜八水餐風方躑躅
三山挂席自徘徊談詩靈羨長江簿問渡應乘大海杯

貝葉勤翻今果否無將綺語負如來

折葦西來海水乾閑看日月走雙丸九環卓地尸黎密

一語彌天釋道安獅吼聲聞真妙諦狐禪雪竇已闌跚

憐余塵世猶茫昧芋火遙從問嬾殘

與爾相逢話劫灰囊中玉蹠拂雲開黃衫莫漫煩蕭翼

襖帖無須付辨才幾度山樓成筆塚異時鐵限鎖莓苔

未央碧瓦終何極笑指鬢鬢雪滿腮師好藏書畫亦善書所寶有未央瓦

硯而美鬚髯

落紙寧爲癡凍繩眼如點漆眉如稜乍揮彩筆矜文苑

時向寒山續佛燈雋永稍同三語掾苦吟端似六朝僧

厭厭莫待如曹李獐狝狎狎亦可憎

戲贈江南畫師徐完先

徐好奕與酒

江左風流白項烏逢君啞啞似吳歛冷如鬼手侵人臂

博借神叢溷座隅碁局消閑稱座隱丹青無恙寫眉鬚

雲門山下頻沽酒知與何人倒玉壺

西園雅集快清遊爾是公麟第一流半局殘碁頻落子

百錢繫杖復何憂畫中六法勾龍爽頰上三毛顧虎頭

何不圖余丘壑裏漫將浪墨寫滄洲

潑墨淋漓膽氣麤蕭然一蹇向江湖韞材與可真疎放

乞食淵明笑躡屨縱賣青山仍介士閑傾白墮卽吾徒

華亭一派居然在爲寫煙江疊嶂圖

望見鄰園果實甚盛戲題

爲園十載碧層層棗大如瓜嘆未曾林際梅酸堪止渴
哀家梨脆莫須蒸棗駝種樹真無敵鑽核欺人想以能
納履整冠吾倦矣垂涎不是玉壺冰

戲贈狎客

愛爾滑稽郭舍人翩翩風度玉嶙峋歲星若不歸方朔
上帝寧知有弄臣優孟衣冠何太似偃師啼笑美無倫
當筵爲奏臨春曲玉樹歌聲未厭頻

寄懷平原留軒大兄

余自丙子丁內艱
戊寅復丁外艱

大明湖上素心違十載傷離見面稀抱病經時無尺素
頻年相續泣麻衣愁來髣髴俱零落老去鷓鴣亦倦飛
般水北流三百里難從馬頰問漁磯

歷下當年意氣真不堪往事苦重陳飄零白雪樓前客
徒作滄洲夢裏人弟畜灌夫推祭酒文如張載是前身
何時更奉槃盂會憐我幽優竟隱淪

每從遠道勸加餐念我笑笑嘆素冠屈指雁行俱老大
歸休鹿砦已闌跚修文地下長多恨命駕塵中亮亦難
猶幸 聖朝收鞵線寒 需次半衰殘

哭唐太史豹巖先生

二十一名楚些吟
八首有於戲老

成隕謝名德彫殘海邦無慙一之遺再聞哀些
淄邑罹陽九之運重墮大星司寇公既泰山頽
于前太史公復哲人萎于後天平何忍喪我典
型人之去山貽茲殄瘁週年之內罷市相將八
月之間相春貽恨司寇公卒于去年十一月
太史公卒于今年六月藝
林輟業何殊峴首之悲父老哀吟來會太丘之
葬緇維豹岩先生列宿降神金門通籍早歲効
忠于國史館標蹇諤高風平居爲善于家鄉袞
樹斗山雅望詞垣推敢諫如永叔當慶曆之年
海曲仰達尊儼君實處洛陽之日人倫哲匠清

門久重三君大雅弘長品藻爭希八俊人思御
李望壇坫以知歸士願識韓捧槃孟而至止一
時餘子盡屬邾滕四國羣公悉通僑札晶晶水
鑑辰過汝南月旦之評朗朗玉山不啻譙郡雞
羣之鶴陶通明仟膺真誥不註虫魚葛長庚髣
髴飛仙將昇雞犬平生着幾兩屐踏遍溪山半
世讀五車書流觀冊府縱橫一萬里擬司馬氏
之浮湘上下幾千秋媿文中子之講學抉微搜
秘蜜惟二酉三餘析異證同何減雙丁兩到隸
玉雌之牛耳斯文既有同心來蒿徑之羊求吾

黨豈云阿好堂名志壑矢丹心于鳳闕披肝事
日畫餘誌清况于虎頭潑墨依依五柳寄傲南
窗嶽嶽雙桐俯臨東閣借鴿樓地容十笏以立
言立德爲立功放生磯枕帶雙溪推濟世濟人
而濟物泊乎晚歲棗鑰元關窺彼靜功鞭心內
景放大智慧非雪竇禪具無碍之辨才旣方圓
之並畫爲廣大之教主抑詞翰之兼長總持雅
道垂五十餘年領袖風流蔭數千百輩夫何龍
蛇當阨瓊瑰盈懷無疾考終亮先生之正命感
愴隕涕實後死之難忘蒿里大歸竟是誰家之

地巫陽下召難招哀郢之魂帝鄉來束帛之名
卿遺賄襚者千里海國奔素車之善類嗟埋玉
兮萬人趙臺卿自卜佳城卓哉高致白香山豫
行誌墓允矣曠觀靈府智珠固已將歸天上秦
篝鄭絡祗餘飲恨人間嘆舊懷賢竊比八哀之
義抒愁寫怨溢爲九辯之章

當年釋褐事先皇棗筆陳書入未央帝闕雙龍瞻御座
天門孤鳳在朝陽引裾報罷留臣節借劍歸來下玉堂
四十餘年追盛事高名烈烈痛柴桑

弱冠金門侍從臣煌煌兩疏拜楓宸長沙前席仍流涕

宣室批鱗問鬼神放逐東華存士氣陸沉北海擁閑身
餘生著述元亭畔愁絕年來問字人

侍書猶憶建章宮濂洛衣冠處士風千載翰林追四諫

萬言伏闕見孤忠引經動欲掎臣職折柳還期養聖躬

三歲詞垣心力竭惟餘寥落海雲東公在翰林建言始未詳于公所自著

林臯漫

錄中

蔡光乙夜黯然收天祿新書罷校讐七略未成拋汗簡

八磚歸去老羊裘厚顏不少高司諫補過誰聞陽道州

出處如公真不憾何如碌碌牧丘侯五六謂先生所糾之陰給諫

青綾銅椀舊瀛洲老去棲遲借鶴樓秋水澄澄奈郭向

清言疊疊逼殷劉牀頭耆宿先賢傳筆底風霜考異郵

我作天東人物誌如公那不冠清流

年來久矣厭焚魚里巷逍遙下澤車但向清溪成嘯傲

無勞黃紙問遷除一編溝洫蘭臺誌千里河渠太史書

博物司空今已矣延津龍劍重欬歔五六謂先生修吾郡吾邑兩誌也

海岱維公建斗杓憐才盛事若為招韓門弟子今遙落

洛下書生劇寂寥大雅消沉悲叱咤小山承蓋嘆鷓鴣

梧桐齋裏銀牀冷不待秋風已盡凋

浮名淡盡野雲二十歸田賦遂初自古誰能三不朽

如公宦負百城書辭榮般水堪終老遺恨廬山未卜居

慚愧年來稱二仲杜陵松徑杳愁予公會有志卜居玉簾泉側第六句及

禽向當年亦不孤采真勝侶徧江湖探書司馬遙臨越

避跡梁鴻更入吳匣裏雙龍餘寶劍囊中五嶽有新圖

老年高卧長溪側一壑蕭然似澤癯

海內同瞻長者車先生幽意溷樵漁風鳴句曲樓中鶴

客問琅嬛洞裏書奇字昔曾尋汲冢荒園今復過陶廬

莊山古屋蕭條甚更有何人弔隱居

萬國昇平玉輦遊上元甲子見龍旂侍臣對御朝行在

聖主停驂問故候七萃屬車傳警蹕兩朝遺老在林丘

那堪重讀東郊記彩筆如雲不可留甲子歲先生迎駕德州有東郊記

家令陳書世所驚萬全爭似趙營平龍韜氣奪單于壘

虎節深籌漢將營金版一時初建策玉門五餌坐談兵

先生自抱匡時略慷慨空吟塞上行歲丙子禁軍西征噶爾丹先生著有

備邊十策

放生磯畔意迢遙幾曲銀灣蔭柳條鳧藻隨波依落日

魚龍濡沫漾微潮蓮池何異通三竺德水居然似六橋

今日先生乘化去人天痛哭雨瀟瀟先生立放生硯于孝水上以禁網罟

蓋做西湖雲栖故事也

志壑堂中感寸心門前五柳晝陰陰周南太史傷留滯

浴下先生誌醉吟鶴老松巢啣五粒鳳飛丹穴迴千尋
林臯閣下空長痛薜荔無聲落葉深
淒淒長夏雨初晴窮巷遙聞樞馬驚絕少中郎銘有道
身非特進誅淵明士林憔悴行相問天意消沉氣不平
愁絕荊州人物論元龍使我淚縱橫
山陽笛裏幾迴過虞殯初聞似楚歌白墮昔時澆塊壘
黃墟今日渺山河荒荒落照臨池晚拂拂秋雲入檻多
回首竹林悲往事當年嵇阮痛如何
五畝園中春復秋先生遁跡隱滄洲琅玕獨對千竿竹
湖海人歸百尺樓手種菊花新栗里卧聞漁唱舊英州

祇今多少羊曇恨不到西州亦淚流

太冲作賦本荒蕪玄晏先生意氣殊祇爲當筵成一諾

遂令絕筆序三都玉樓待詔行將及蘭室揮毫定不渝

痛哭鴻文真異代哀吟我欲勒球圖

先生久許爲余崑崙山人集序臨終

數日前脫稿招余面贈叙致雄暢真絕筆也

帝遣巫咸出九閭扶桑今有未招魂太荒披髮麒麟下

員嶠奔車日月昏自有雄文垂地軸常留逸氣接天門

惟憐潦倒平泉客腸斷當年北海樽

迴廊嘉樹迴無塵斐幾繩牀白苧巾揮翰綠天舒鳳尾

著書蒼檜長龍鱗余慚水部當時客君是山濤以上人

昔日流風安可見九歌聲裏哭靈均

東山高卧老風煙安石冲襟世所傳橘種子頭何歷落

堂成一榻足迴旋筵開羊曼稱真率人到龍門願執鞭

今日蕭條秋色苦不堪重賦入哀篇

金馬羞同王子淵歸來汲古海雲天郵筒驛騎三千里

名教干城五十年土室袁閔非避俗高齋蘇晉偶逃禪

穎川耆舊今寥落玉樹塵埋意黯然

中原前輩久沉淪落落晨星更幾人海內至今推大雅

廟堂時復說遺民總惟客有琴山嘆白馬人來陌上塵

一束生芻長太息南州孺子淚沾巾

竹裏閑階曲徑通舊曾遊處雨朦朧受書我愧如王粲

倒屣君還類蔡邕常憶別來風裊裊翻嫌歸去話匆匆

誰知終古傷心地柳絮烟花小苑東

華陽樓上罷吹笙咫尺浮雲隔九京六帖傳書思白傅

萬人執紼哭黃瓊海山去把浮丘袂玉帛誰尋歷下盟

愁絕畫餘亭畔路蕭條塵尾不勝情

西子湖邊紀勝遊孤山清冷坐高秋餘杭美酒詩千首

蘇白風流月滿舟天地無情頻送老人間何處可埋憂

十年契濶延陵子痛哭吳山最上頭

少宰騎箕重可傷何堪太史繼淪山道山回首原無恙

濁世歸休遠自藏，二老乘雲翔碧落。九霄馭鶴返滄桑，
誰知野哭枌榆社。冷落停春淚萬行，猶憶登堂對落暉。
流連笑脫薜蘿衣，浮生縱少松喬侶。轉瞬何期薤露晞，
一草亭中人寂寂。萬年枝上雨霏霏，雄談昨日猶強健。
誰道先生竟不歸。

將赴郢中經歷下白雪樓

郢中亦有白雪樓
以下庚辰

千里遙爲郢上遊，欲同屈宋賦悲秋。九歌不改陽春曲，
兩地重登白雪樓。滄海東流波浩浩，漢江南去路悠悠。
湘蘭沉芷方堪采，無奈風塵上蒯緱。既渡泗水去聖林不遠。

年來關里望悠悠，此日言遵泗水頭。村落桑麻今歲月，
人家禮樂魯春秋。天留一帶文瀾濶，地近孤城教澤流。
翹首聖林知不遠，蒼茫十里暮雲浮。

初至曲阜

五日離家問驛程，乍窺聖域轉堪驚。千年草沒靈光殿，
十里雲寒曲阜城。講業竟從鄒氏邑，褒衣欲附魯諸生。
今朝親見先師里，珍重三熏奠兩楹。魯城遙在彩雲端，
百尺丹樓畫裏看。車服未瞻新禮器，講堂將識舊衣冠。
尼峰東望秋烟碧，泗水西來落日寒。此際執鞭真夙願，
幸從大海沂廻瀾。

聖林前墓道古松

萬古長春坊前後松皆兩行成列墓門日功參造化樓

文津橋畔碧波流御道青青映畫樓千尺虬龍盤鸛鶴

萬年風雨護靈丘雙根天矯排雲上黛色參差向日浮

慚愧半生空仰止一親聖澤慰清遊

墓門內洙水橋

三橋東西並列而中橋直聖墓。旁有碑曰輦路。洙水環墓前相

去僅半里許泗水則
遶出林後六七里餘

虹橋並峙亦巋然玉柱雕欄輦路邊赤水乎珠迷象罔

清水紫炁照虞淵神龜遊戲留三古龍馬騰驤上九天

濯德縱非江漢側飛流直過墓門前

恭謁

至聖墓八章

林形像鳳之前狹後張且百鳥不巢

海畔棲遲華髮侵神遊闕里到于今源流嚮往千秋業

誦法生平一片心隧道陰陰松柏路禁圍藹藹鳳凰林

今皇玉輦經行處五色雲中氣鬱森

入望先登百尺樓無邊嘉樹自修修祖孫道統千年派

洙泗淵源二水流鳥散空林尊壠墓人從輦路識松楸

盛朝屢廣先師地萬頃蒼茫佳氣浮

洙水亦泗水支流如子思之于

至聖

洙水長橋瑞氣凝宮牆十里直如繩寢園莫擬恭王殿

勝勢東連少昊陵華表秋雲生石馬亭堂麗日照觚稜

陳牲釋奠年年事爭語吾皇奉豆登

聖主文明自薦牲上元甲子駐霓旌
四璉篋篋勤三獻萬乘衣冠拜九京
宗伯隆儀頒內府太常雅樂奏中聲
傷麟嘆鳳傳千古幸魯新傳大典成
千章珠樹走風雷墓道遙瞻金粟堆
自有六經延聖脉豈乘五德問興衰
文河浩蕩滄溟濶龍勢蜿蜒岱嶽來
長夜一燈終古在浮雲散盡碧天開

當年啟宇伯禽疆五百昌期經聖王
玉冊譽文傳黻繡金天虹氣接窮桑
魯源村近留遺跡鳧嶧峰高映夕陽
此去壽陵應不遠遺弓遙在鼎湖旁

高陵蒼草盡歲豨瑞氣如烟影陸離
一德靜隨天地老萬年真作帝王師
穹碑共識蛟龍篆釋奠常停日月旗
駐蹕亭邊傳故事野人猶說漢威儀

乾坤無恙鬱岩峩不逐興亡劫火燒
久識春秋三統正非因風雨萬靈朝
長橋拔地流洙水老樹參天拂絳霄
一到昔賢廬墓處深知道德慰蕭條

天書樓

卽奎文閣

天門宮闕鬱岩峩今日尊師賴聖朝
寶誥千年留浩劫飛樓百尺麗重霄
穹碑日照龍紋古閣道風迴玉殿遙
誰向奎文探秘笈鸞車五色瑞雲飄
照天奎壁敞彤闈萬仞高寒入翠微
碧瓦龍鱗浮瑞靄

雕窗螺甲晃晴暉九霄門掩金鋪冥兩序松高玉粒飛
一爲凭虛舒遠眺遙瞻聖域重依依

濟寧道中

名區夾道擁塵埃五劇三條亦壯哉芳草有懷烟欲合
夕陽無限夕飛來會通河上樓船度汶水堤邊驛道開
獨惜南池坐相失酒樓未得一啣盃

考城劉家樓渡口與焦慎思同渡黃河

微風習習入洪波一葉輕舟水上過老我半生樓碧海
與君八月渡黃河問津古岼遵遙渚擊楫中流發櫂歌
此去漢江千里道客心搖落欲如何

河源聞道出崑崙浩蕩中原日月昏北折金城廻萬里
東來砥柱下三門非因風雨波濤壯自識蛟龍氣象尊
邇日堤防民力竭又傳竹櫂賦淇園

浩浩吞天萬里流神魚拂鬱隱龍湫挾來八水分南紀
直下三川控上游瓠子尙須菱玉計宣防時厖廟堂憂
河堤使者休言瘁白浪如山我亦愁
伊洛山川舊帝京潼關東下任縱橫河流雍豫波常怒
地入徐梁勢漸平水擊三千歸海若龍門一線走奔鯨
安能乞得巨靈手爲築金隄萬里行

渡河遙計迤西滎陽成臯一帶爲楚漢戰爭地雜

感三首

廣武山前控上遊遙遙弔古自夷猶中原形勝歸京索
異代興亡憶項劉監子成名凡幾輩英雄割劇向千秋
征途冉冉悲歌者我亦飄零作浪遊

楚歌楚舞黯然收回首衣冠盡沐猴五色龍紋成王氣
千年霸業割鴻溝那堪白眼風塵際不盡黃河日夜流
終古虎牢關下路乾坤百戰使人愁

橫空殺氣莽滔滔隆準歸來夢亦勞曠野秋風迴大澤
荒原落日下成臯軍中挾質寧云勝鼎上烹翁未足豪
回首烽烟多戰伐蕭蕭故壘長蓬蒿

陳留張子房廟

萬戶通侯莫浪加報韓心事亦堪嗟橋頭秘笈穀城石
夢裏金椎博浪沙遁世赤松誰復見封留湯沐未云奢
當年不羨蕭丞相劍佩珊珊入漢家

望大梁懷古

雄城烈烈氣氤氳十里塵飛道路分屠狗欲澆朱亥墓
夷門誰弔信陵君蕭條良岳逢秋色寂寞隋堤鎖暮雲
苦憶黃鶴埋寒後百年生聚尙紛紛

過尉氏城是蔡邕阮籍故里

三亭岡接宋東京此日荒涼逆旅情一片黃花開雉堞

幾家茅屋對秋城典型已失中郎將長嘯誰聞阮步兵
太息茫茫衰草地無邊野水浩縱橫

拜漢司隸校尉李公元禮墓

在襄城北

英鋒奕奕殿炎劉海內規模此尚留節比范滂堪並世
人如郭泰始同舟甘陵水火開鈎黨左校刑徒類楚囚
今日九京如可作龍門誰不仰風流

襄城道中大霧

策馬經過湖水西無邊草色意萋萋人來許下雙溪遶
路出襄城七聖迷大野遙天遮遠樹橫塘小渡入長隄
茫茫十里飛塵滿霧暗黃埃落日低

首山南去是羊腸曾是當年鑄鼎場一片荒岡悲大楚

四圍黛色似吾鄉健兒暴客應難辨芻牧幽人自不妨

此去其茨知未遠誰從問道溯軒黃四望多山而首山有皇帝遺跡在城

東南

舊葉縣旅館聽雨

稍解嚴裝古道東宿雲如墨暗長空旅燈孤照羈人夢
野店涼生破牖風寒漏又逢秋色裏愁心無奈雨聲中
自憐為客恒多難明日登車似轉蓬

舊葉縣山中

醴水在舊城北

昨霄空館雨冥冥行子征途未敢停醴水晴沙彌望由

楚天遠岫入雲青登高縱不如邛坂履險真如下井陘
此是昆陽征戰地沙場慘慘弔寒汀

裕州城北漢世祖廟壁間畫二十八將蓋雲臺列宿也。村名扳倒井相傳為

光武行軍地。廟中有老檜古桐

宛下衣冠此定殊洛陽曾作執金吾綺疏畫楹盤蒼檜
露井銀牀對碧梧漢室中興新室滅帝皇高映客星孤
元功無復韓彭嘆不負東京共部符

布衣文叔自寬仁百戰艱難亦苦辛畫壁威儀留劍履
凌烟廟貌寫麒麟一時圖讖歸真主萬國駢旄賜近臣
終古尙傳收五校鄙南佳氣自常新

迢迢百里接昆陽兵氣全收日月光一自龍鵬登玉闕
異時茅社隸金湯靈臺舊列星辰上大樹曾依帝座旁
自是中興歸聖主赤心置腹本蕭王

赭陽道中 卽裕州

雄城百雉亦消沉三戶凋殘感至今野徑草深齊馬腹
荒村泥滑沒街心數家烟火成墟落十里瓜棚息遠林
休養年來竟何似當時戎馬重侵尋

蕭條百里迥無隣一望荒涼倍苦辛白葦黃茅疑伏虎
陂陀仄徑困行人路逢劍客驚遊俠道遇樵蘇敢問津
于役艱難君不見何如高卧故溪濱

當年雄勝竟依稀井邑蕭條事已非
旅雁陣衝秋色遠寒鴉影背夕陽飛
纔過紫陌看紅葉又向青山入翠微
大野茫茫愁欲絕喜投空館解征衣

博望驛弔張騫

騫封博望侯即此地

西域迢迢亦壯遊河源曾此沂崑丘
千年封爵傳郵驛萬里乘槎犯斗牛
苜蓿携來飼天馬葡萄豈為博涼州
當時漢武真雄畧能識吾家博望侯

博望屯懷諸葛武侯

諸葛鴻材迥絕倫子房或者是前身
草廬指顧懷成算羽扇風流若有神
許下羣兒驚咋舌荆州八及更何人

代攻自爾真長策試看當年博望屯

宛下懷古

是光武起兵處

太平陳聖亦荒唐唐厭勝爭傳夏賀良
白水讖歸銅馬帝赤符兆自貴人鄉
天教宛葉成豐沛運啟文孫奉漢皇
回首春陵王氣在西京文物屬南陽

雨中行清河東岍上

清河即白水也河甚深廣南行數百里乃入漢江

綠水洪流欲上潮十尋高岍俯征橈
雁貪玉粒依香稻馬蹇銀沙渡石橋
過嶺客衣雲外冷傍河村落雨中遙
鄉心忽起悲行役愁對西風更寂寥
秋色連天意黯然飛流百折走蜿蜒
銀沙遠岍層層事

碧樹長隄處處烟人過荒村風淅瀝路迷古道草芊綿
無端客裏征車滯惆悵黃門苦雨篇

望卧龍岡懷武侯

草廬誰說已荒涼樓觀鱗鱗映畫堂志狎孫曹皆鼠輩
人如管樂自龍驤登壇不讓淮陰策顧命能令漢祚長
當日馳驅勞百戰躬耕安得老南陽
九州妖孽障乾坤誰似求賢漢帝孫龍卧當時樓宛下
雄飛奮跡自荆門吞吳坐困重江險伐魏終窮五丈原
自是先生非失計樓桑龍種太淪昏
雲擾中原王氣收當年抱膝自夷猶南來要自酬三顧

西去終當跨二州但使終身存漢臘何妨一死報炎劉

蕭曹究竟稱文吏誰說齊名忠武侯

新野懷古

城內有光武廟及昭烈與徐庶議事臺

昭烈依劉亦霸才當年小築古城隈蕭條異代原陵廟
慷慨千秋議事臺百貨鱗居白河下群帆估客漢江來
獨憐苦雨如張協盡日衝泥且未回

新澱浦舟渡清河

迢迢遠勢俯陂陀有客南來近清河紅蓼滿灘看鷺立
清流一曲蕩船過坵深泥滑人驚渡水淺風微雁掠波
不及掉頭漁父意賣魚估酒自狂歌

入湖廣界宿襄陽縣呂堰驛

是襄陽地在羣山中最荒僻

岡連崇阜萬山中行盡幽篁又會叢大澤龍蛇迷遠近
荒原草樹接空濛馬嘶正苦連朝雨虎穴頻驚向遠風
古驛蕭條聊寄寓夢魂淒切楚雲東

初至樊城

羣山中楚山最高天詩云楚山插雲青

人來江上雨冥冥暫脫征驂且復停漢水照天千里碧
楚山拔地一峰青尋幽欲述先賢傳高隱曾聞處士星
但使名區估美酒陶陶終日莫須醒

冒雨長征霧氣濃西南隱隱見諸峰客來驛路三千里
天接江雲幾萬重漢渚高風重司馬荊州物論數元龍

誰聞一曲襄陽樂旅館清吟日下春

襄樊雜興

隆中山在襄陽西南萬山在城西

客來滯跡萬山東一望江天便不同漢上六州雄海內
南陽諸葛隱隆中雲連楚岫常多雨地近蘭臺更有風
咫尺習池未相見接羅何處最山公

沅芷汀蘭欲斷魂倦遊誰復念王孫波翻漢沔流南紀
地控荆襄壯北門水國烟雲多變態江天風雨異中原
迢遙自嘆驅車者何日還轅向故園

荆門策策落丹楓慘淡秋客四望中江漢分流千里遠
鄖襄一帶九州通不勞漁子銅斗自有騷人續楚風

漸近名都郢中地朝雲飛去細腰宮

梁祖稱兵據上游六朝人物重荊州長江驚識銅鞮馬

少海初開文選樓建業千年餘王氣楚雲萬里賦悲秋

猶傳樊鄧當時曲漢水茫茫天際流

當日中原勝氣收南來昭烈負深憂景升兒子真豚大

孟德欺人似沐猴尺土有階留漢社雄城無計劃鴻溝

劉琮何厚劉璋薄借得荊州勝益州

江左曾開南雍州蕭梁曾此控東陬勢連宛口羣山合

遠接荆門九派流三顧猶存諸葛宅一丘誰識仲宣樓

大隄城下寒江水終古西臨杜若洲

旅愁久未一開顏今日優游漢水灣鄢郢遙連三百里

襄樊對峙兩雄關微茫不辨烟中樹歷落平看江上山

惆悵楚雲最深處誰從峴首一躋攀

襄陽遊俠漢臯西翠袖圍香解並樓浪擲黃金估客樂

慣乘赭白蹋銅蹄江籬肆映依蘭櫂竹葉千鍾上大隄

誰見城南騎馬路高陽池上醉如泥

江干贈客

與君相見下江關指點雲巒一解顏漢曲遙遙三里渡

城陰疊疊九宮山人依司馬忘賓主地近龐公欲退閑

今日相逢秋色裏真疑耆舊在人間

望隆中山懷諸葛丞相山在襄陽西南

炎火無光寄兩斟先生高枕漢江濤隆中豫識三分計

梁甫吟成一片心伊呂勲名堪伯仲崔黃耆舊半銷沉

小橋流水依然在愁絕西風落葉深

百戰中原亦慨慷至今二表貫三光豈將劍閣千尋地

僅博城都八百桑絲竹有人稱令子永安披髮訴先皇

當時不媿中山嗣烈烈猶傳北地王

鼎足巴江亦孔艱武侯心力盡征蠻千秋魚水真同調

一日風雲竟掩關王業未償籌筆驛大星貽恨定軍山

當年來往襄陽道終古清塵不可攀

樊城三忠祠祀南宋牛富張貴張順宛義襄江者對岢城西北隅有望江樓

當年師相福華編坐困巖疆已五年義士揮戈沉水國

危城折脰沒虞淵崔嵬祠廟臨江岬歷落英魂聚楚天

今日客來遙問渡望江樓畔意淒然

萬里潭襄陽城西杜元凱沉碑處

萬山潭下沉碑處借問何如墮淚碑浮世升沉俱莫定

人間陵谷總無奇白雲蒼狗須臾事滄海桑田又一時

羊杜功名竟何在寒江東去不勝悲

解佩渚在萬山潭下

麝蕪香路碧波通交甫幽期詎再逢事去芝田思解珮

人從洛浦盼驚鴻
心懸漢曲明珠贈
望斷江干橘柚風
朗咏雲中君
見石楚天漠漠雨濛濛
別渚憑誰駕小舸
淒淒幽怨寄離騷
天涯暝雨悲江浦
客路秋風夢漢臯
楚岫無情明月落
靈妃有恨碧雲高
采芝贈佩何年事
欲托微波問暮濤
漢濱逸態想依稀
照夜珠光素月輝
雨歇巫峰鄰楚峽
烟深寒渚步江妃
彩雲散盡青山老
玉佩還從白鶴飛
橘綠柚黃君不見
願將羅袖拂臣衣

南望

南望湘纍客
子悲風流宋玉是
吾師
雨來楚澤秋多怨
酒近宜城醉不辭
江上未搴蘭茝佩
旅中誰折菊花枝
西風蕭瑟天涯暮
漢水蒼茫有所思

渡襄江 四首

南望層城慰旅懷
登舟依舊踏芒屨
懸甍漁子留深港
近水人家住斷崖
一棹乘風遵雉堞
千章伐木下松
茫茫烟雨知何處
只在秋江天一涯
瀾瀾襄水接長空
萬古洪流日向東
雙漿波紋千尺纜
半江雲物一帆風
城隅委折緣堤路
斷岍常依帶雨篷
南望羣山蕭瑟甚
無邊秋色入鴻濛
漢江舟子報潮生
却下丹崖小艇橫
竹屋千家臨曲渚

津樓百尺對雄城烟深水與遙天接風起船隨兩圻平
獨自停橈趨岷首揚波莫使旅魂驚

麗譙隱隱傍城隅岷下雲帆接舳舻蝦菜千羣歸郡郭
鯨濤終古撼名都截江魚入龍鱗網列肆香生象眼酥
太息壇溪西畔路當年躍馬府中趨

襄陽人物坊

載宋玉王逸王延壽諸人之屬于上

襄陽人物紀雄都文采風流幸不孤秋水無情香草暮
騷人有恨露蘭枯王家父子稱能賦楚國山川痛左徒
我欲問天天不語江潭放逐竟何辜

登岷山過羊太傅祠觀墮淚碑

古廟陰森結采椽山門遙接習池邊封章早建平吳策
緩帶風流太傅賢當日荆襄煩北顧萬年江漢控南天
岷山猶有遺音在不覩豐碑亦黯然

當年羊陸鎮江潭保障巖疆竟不貪借箸終窮張相國
同心端賴杜征南三公折臂名猶赫萬里長城事未慚
今日尙傳遺愛在行人灑淚一停驂

岷山南麗過習郁池懷古

習池南接鳳凰樓風物蕭蕭正暮秋地近炎方多霧雨
人從西晉想風流一泓綠玉高陽侶十里清江畫鷁州
山簡當年沉醉處客來不共葛強遊

銀塘澄澈蕊珠宮
石子斑斑碧蘚中
地脉有靈隣漢水
華池留醉與山公
接羸倒着人如玉
騎馬歸來氣若虹
但使并州健兒在
豪遊應傍大江東

由習池南過鳳凰灘岍上

鳳凰嶺上鳳凰閣
下俯寒潭百丈清
山半泉流成瀑布
江邊人語亂灘聲
習池未覺風流盡
稊飲猶傳後世情
惆悵名區千載下
楚雲孃孃客愁生

鳳凰亭迤西路險甚

鳳凰山上鳳凰亭
雙翼凌空俯淺汀
入楚烟光千里黯
過江山色四圍青
泥深大壑停征轡
水落高灘似建瓴
一唱鷓鴣行不得
客心漾漾走浮萍

峴南道上 四首

懸崖翠嶺枕蛟宮
百折漩渦仄徑通
秋水波瀾增壯潤
寒江雲氣散長空
烟迷雁鷺孤洲路
浪湧魚龍夾岍風
不敢隨流蕩舟去
蕭蕭愁絕楚天東

巖際雞樓三兩家
天陰楚澤走龍蛇
斷崖每改憑高路
絕磴常迴避險車
萬樹芳洲連野塢
孤村籬落隔江沙
旅遊憔悴生長嘆
坐使風塵閱歲華

寒鴉棲樹暮飛翻
搖落征人慘旅魂
波嚙江干成斷岍
人依沙路入孤村
漁簑帶雨歸茅舍
樵徑當門沒水痕

楚客傷離愁欲絕悠悠往路已黃昏

紅蓼青蘋水上鷗微茫烟景正殘秋
瀟瀟暝雨迷前浦黯黯江雲系遠愁
四望滄洲成淺渚一灣綠樹引歸舟
何時息馬荆南路一醉西風慰倦遊

江畔

沿堤細路踏寒莎漠漠秋雲水上多
十丈懸崖崩野岫孤舟晚唱晒漁簑
道旁枳熟垂金彈塘畔波紋捲綠蘿
莫怨征人行役苦郢門屈指隔江沱

漢臯

漢臯東去晚烟濃江上青青有數峰
漁父滄浪終莫問鄭詹龜筮竟何從
湘潭憔悴應如故秋水蒹葭定幾重
頌橘懷沙俱已矣九歌聲裏落芙蓉

望鹿門山

鹿門山下聽江聲中有幽人遠世情
水鑑千年留品藻龐公十畝憶躬耕
高風直與秋雲白姓字真同漢水清
猶有孟皮詞賦客紛紛餘子盡知名

林外孤村烟火殘悠悠遠樹帶雲看
秋深鴈落魚梁務天濶風迴鴨嘴灘
傍岫一帆人悄悄平江十里水漫漫
誰知鼓柁歌聲杳惟見輕鷗下急湍

江干遠望

漢上浮雲盡日閑馬蹄蹀躞亦云艱大江歧出沙千疊
枉渚微波玉一灣密雨重遮蘇嶺樹寒烟坐失鹿門山
襄陽自古多遺逸今日何能共往還
西風何處采江蘼草木蕭條亦變哀漢水拍天波淼淼
江雲如黛雨垂垂疏村乞火逢人少歧路停鞭策馬遲
晒網漁翁真寄傲憐余不及弄潮兒

冠蓋里

漢時自襄陽達宜城二十石
接跡相望人謂之冠蓋里

南州物論已沉淪當日羣登要路津
听遠風微堪息馬江清沙白最宜人
荆襄文采推前輩宛洛衣冠逐後塵
百里迢迢尋故事殘碑歷落接荒榛

鳴珂故里塞通津紫綬金章憶昔人
此日高原餘蔓草當年夾轂走香輪
襄樊物望稱耆舊龐馬遺音半隱淪
我作荊州風土記欲從石碣攷貞珉

峴西望漢江

靈均憔悴意難平今日臨江見旅情
浪湧風檣天上落雲飛魚鳥鏡中行
羣山靄靄村烟白兩岫澄澄漢水清
誰折瑤華將贈遠湘潭無路采香蘅
東望羣峰接翠微黃塵細雨復霏霏
蕭疏岼柳連天遠婀娜江帆貼水飛
人在漢臯遵雁渚雲從村落度漁磯
滂沱無奈長征苦敢托微波訴宓妃

由岷西山茭舍至小河店旅宿

岷西山畔旅愁繁
行路之難不可論
馬識危橋驚不度
客來險徑自銷魂
平臨赤磧疑無地
直上青天夾一門
縱使十千估美酒
羈人潦倒已黃昏
多少泥塗上客衣
芳洲小渡上危磯
驚沙渚鴈衝寒起
背水檣烏帶雨飛
山脊人烟詢路遠
江頭漁火送船歸
遙天野隴經行盡
旅館蕭條重可欷

漢黃憲墓

在宜城北十五里
憲著天祿閣外史

叔度聲高處士名
汝南人物勝袁閔
風塵外史傳天祿
公府徵書却漢京
人識牛醫千頃度
墓隣漢水一潭清

九原此日瞻丘壠
慷慨誰令鄙吝生

宿宜城

香山有宜城
酒如餽之句

霧暗南天久未晴
遙遙愁緒若懸旌
客來旅館風如鏃
人道宜城酒似餽
白小江魚燈下飲
青簑笠笠雨中情
水深泥滑悲長路
何日停車故郢城

曉發宜城

秋花岼曲散歲蕤
曉日曛曛欲上時
新霽江雲飛片片
乍晴山雨復絲絲
寒塘水涸魚來少
別渚波深鷺起遲
北指海天千萬里
頓令遊子不勝悲

宜城道中

山荒涼烟火稀都都今始放晴暉垂垂岼柳潭中影
淡淡江雲霽後飛曲港停舟聞桂楫橫塘近水閉柴扉
揚鞭走馬長堤路明日蘭臺振客衣

喜晴

重陰已久蔽烟霏今日晨光敞曙暉水面乍看江雨散
山根喜見岫雲歸雁啣蘆葉驚人起鷺上漁梁背日飛
縱使泥塗猶未免不妨曉露入秋衣

寄內

余以中秋之後一日離家

金粟團圓桂樹秋銀河爛爛月光浮卿如徐淑恒多病
儂似秦嘉好浪遊今日飄零樓水國何時風雨共山樓

漢江東去三千里不寄雙魚到海頭

乾河頭渡支江

是晚將宿豐樂驛

北來欵段擁征鞍漢渚茫茫動客嘆岐出支流千尺浪
一篙秋水半江寒頻驚柔櫓當風岼稍喜輕舟渡淺灘
此去驛程三十里便應高卧且加餐

望金沙灘

萬柳陰森映小洲金沙灘畔宿雲收畫船樓閣中流見
麗日鼉鼉出水遊怨入離騷難作客人來江漢自悲秋
滄茫古驛淹行李明日輕風到郢州

豐樂河渡江

豐樂河邊蕩小舟客來理楫向中流一灣綠樹移蘭漿
十里清江對驛樓擊汰揚舠秋瑟瑟眠鷗浴鷺晚悠悠
夕陽欲下人爭渡風起楊林古岫頭

尙家塘

小築幽人托遠郊便應疑作孟城坳荒江避迢多臨水
老屋無垣但覆茅密密編籬環野圃叢叢新竹出林稍
故鄉十畝爲園地誰向雲亭賦解嘲

虎門衝

鳥道微茫路阻修虎門險仄動深愁騎牛童子當山脊
驅馬行人跨澗頭浦樹烟寒色淡野塘色滿暮雲秋

重岡複嶺須臾盡却指江城慰遠遊

登南岡在漢水之左

崔嵬秋嶂插雲霄登頓何堪百里遙蹙蹙馬蹄彈石子
蒼蒼虎跡印山腰迴風征鴈迷前路行人畏斷橋
翹首石城三十里蘭臺南望尙迢迢

新奠浦

滿崗亂石虎狼蹲幽峭空岩欲斷魂茅屋數椽山作障
竹籬一帶澗當門采餘綠葉無蓮子刈盡黃雲見稻孫
羈旅誰知行役苦荒村何處覓盤飧

郢中秋興八首

秋風葉下洞庭波太乙東皇冠九歌天入衆星連軫翼
雲迴七澤散江沱湘纍自古才人怨郢客從來下里多
欲采芙蓉攀木末茫茫蘭芷奈愁何

淒惻霜前病葉翻不堪憔悴弔文園 牙關近湘雲亂

雁齒橋迴楚澤昏 路杜歸梅福宅漢江風起莫愁村

問天欲作懷沙賦悵望難招屈子魂

內文園
喻顯

樹連古岼水連空誰說章華有故宮地做蘭臺宜暮雨
秋高蘋末起雄風騷人詞賦留雲夢楚國山川托郢中
咫尺漢江雲不見一天烟霧遠濛濛

千里金風接素秋萬重雲樹阻歸舟漢江葉落丹楓浦

鄧曲人矜白雪樓宋玉多情能作賦虞卿到處有窮愁
可憐楚國風霜苦日日銷魂杜若洲

關山迢遞阻風塵愁絕艱難老病身七澤秋風悲楚客

三湘明月照離人蕙 零落安能佩蘭畹蕭條未可紉

惆悵靈修何處是文狸山鬼日爲隣

楚俗無人唱采蓮秋江牢落木蘭船倚天長劍連雲外
拔地奇峰列水邊漢渚微波晴作雨荆門遠樹曉如烟
高歌我亦巴人曲笑折芳馨佩葑荃

琪樹西風怨落暉憑將幽恨訴靈妃雲來巫峽輕千里
鴈近衡陽憚數飛潦倒湘潭蕙晦飄涼江浦芰荷衣

無端欲效陽春曲莫嘆從來識者稀
躡屩南來萬事違回頭冷落舊漁磯
三秋客路悲零雨十月炎方未授衣
刻羽安能誇絕調陽春幾見和人稀
惟餘寂寞滄江上北望雲從海曲飛

興都雜詩十首

鬱葱佳氣楚雲邊猶說興藩入繼年
朱戶曾開新殿宇滄浪不改舊山川
清宮誰借東牟勇代邸人知漢帝賢
今日蕭條荆棘裏陽春臺畔雨如烟
水火紛紛徧六曹石淙先見亦云高
何妨光武尊南頓寧比哀皇出定陶
議禮貴臣多峭直臨軒聖主念劬勞

誰知激烈多貽禍祇爲先君痛若敖

矯矯新都氣不平永嘉持論亦縱橫
敬皇餘澤留清議

興邸親藩入舊京伏闕呼天無乃戇
稱宗入廟竟難爭

紛紛三易彤庭詔誰說明倫大典成

手攀五鳳撼天門二百年來養士恩
濮國無煩英廟嗣

杜陵豈絕史皇孫但令一日稱尊禮
何日他年冊大藩

貽恨當時嚴夏輩逢迎踰制縱難論

純德山頭氣鬱芊松陰十里護雲烟
衣冠不祇稱原廟

郊祭猶聞更配天逆祀貽饑新鬼大
建言終荷主恩偏

當時大狩飛龍錄百戰遺音竟渺然

當日金輿萬里行，卿雲宮裏瑞烟生。
上陵麗日停鸞馭，享殿微風暗鳳笙。
虎旅千羣荆路塞，龍紋五彩漢江清。
侍臣競進南巡頌，湯沐深恩編郢城。
父老猶傳此上京，顯陵紫炁接天明。
故宮無復龍飛殿，行在曾屯豹尾營。
千里沛豐頻賜復，萬年江漢一停旌。
更聞御製思恩賦，繾綣猶深過里情。

章聖南來奠顯陵，祠官曾隸太常丞。
雲移鳳舸江聲靜，雨灑鸞旌露氣凝。
雉扇兩行廻御仗，羽林千隊耀文繪。
寢園當日升龍馭，誰見松原射漆燈。
肅皇舊日啟祥宮，猶說氤氲御氣通。
合祀初禋興獻帝

輟朝已悼曲江公

世宗幸承天時忽聞張永嘉訃音

十年議禮煩稱制

四海爲家咏大風，此日淒涼秋色裏。
荒烟漠漠郢門東，舊邸承天漢水隅。
郢州亦是楚王都，松陵有路寒雲散。
石馬無聲片月孤，玉匣珠襦留澗壑。
金鳧銀雁冷江湖，惟聞夜夜風雷急。
坐使溫韜免覬覦。

莫愁樂

變體五首

莫愁村在石城門外漢江之濱

莫愁家在漢江頭，人說盧家有阿侯。
白玉堂前鋪綺綺，紫鴛帳裏聽笙篴。
流黃斷後難成匹，銀漢斜時更上樓。
若問莫愁愁欲絕，莫愁應亦似儂愁。
莫愁家在石城頭，愁向城西問莫愁。
織素銀缸懸壁帶

采桑碧玉作籠鉤能歌鸚鵡翻新舌欲折芙蓉上小舟
若見莫愁愁更甚愁來我亦始言愁

漢江依舊拍天流誰說江邊有莫愁四角龍旛持桂楫
五紋絲履入蘭舟伯勞東去樓紅柏燕子西來上畫樓
不信莫愁愁不盡請量海水比儂愁

石城城外水東流愁向江邊是莫愁每妬楚山青學黛
慣看江水綠如油采蓮歌歇茱萸泝弄楫香生杜若洲
但使莫愁愁似我莫愁何必更深愁

莫愁常對漢江流江水何妨送莫愁十六生兒花底活
專城夫婿岫頭候嬌歌月就雲中墜瑤席人今坐上頭

愁見莫愁愁不語莫愁此日爲誰愁

莫愁樂

新體三首中
聯做連珠

江畔孤村動遠愁若耶溪上路悠悠莫愁不忍臨江水
江水曾經照莫愁若訪莫愁貽玉帛還從江水上蓮舟
楚歌楚舞愁何極誰道愁來竟莫愁

巫峽雲歸暮雨收愁來愁去上江樓莫愁試向東南望
漢水何嘗西北流江上莫愁頻灑淚愁來江水不容舟
洛陽嬌女如相問今日依然字莫愁

挂鏡珊瑚玉作鈎鬱金堂裏太溫柔莫愁有恨經年別
江水無情日夜流愁到江干歌子夜江連愁緒爲悲秋

莫愁自是盧家婦何事縈心萬斛愁

安陸登郡城南樓遠眺

卽陽春門

雉堞平臨象緯廻千年形勝亦雄哉城陰邸舍鱗鱗出
天外江流浩浩來元佑宮前秋色老陽春臺畔暮雲開
居然一覽郡山秀絕少當年白雪才
無邊秋色遠蕭蕭一望高城慰寂寥近市人烟環郡郭
因山樓閣入雲霄時平埤堦生芳草岼遠清江隔畫橋
無奈郢中懷古地陽阿絕調爲誰調
幸從天路對雲霞放眼凭高玩物華秋色微寒澄漢水
夕陽倒影照江花名都自古雄三楚烟火如今接萬家

歸去石城城下路何妨坦步代輕車

陽春門外望迢迢澤國陰多蔽絳霄江雨化烟拖水面
楚雲如帶繫山腰青蘋風起蘭臺暮白雪樓空郢路遙
稍喜南天冬日麗漢濱十月未蕭條

憶家

十畝山園孝水湄別來松徑杳無期窮冬作客三千里
終日思家十二時去國騷人愁不盡空齋遊子暮何之
布衾如鐵增離恨夢裏言歸也自疑

郢中讀楚詞

五首

九河鱗屋帶龍堂五鳳雲車萬仞翔欲載雲旗瞻貝闕

漫將枉矢射天狼
江天風入薜蘿路
楚澤香生薜荔房
蕙帶荷衣人寂寂
高歌一曲白霓裳

人來楚水釣神魚
七澤波光浸太虛
長劍切雲歌九辨
靈氛卜日薦三閭
欲從蕙晦攀芳杜
錯把辛夷當揭車
爲問雲中君在否
颺然遠舉竟何如

白蜺嬰茀楚人鄉
天問何緣到畫堂
不盡悲吟留大澤
却將幽憤寄沉湘
龍蛇四壁圖光怪
神物千秋入混茫
獨有騷人終古恨
九歌聲裏痛巫陽

賈誼當年謫楚臣
長江寫憤寄靈均
澧蘭沅芷思公子
哀郢懷沙怨美人
海若凌波呈水碧
湘娥鼓瑟拂華茵

何堪寂寂黃陵廟
月落猿啼倍愴神

蘭葉彫零楚水濱
茫茫何處有江蘿
翠旌共道迎司命
鸞鳥誰從逐宓妃
萬仞迴風流沆瀣
一天清露濕雲旗
湘潭亘古留遺恨
采采芙蓉有所思

東臯

不向東臯卧薜蘿
却來楚水弔湘娥
旅人慣食江魚膾
郢曲惟聞下里歌
異地愁來清夢亂
故鄉望去白雲多
滄洲碧石漁樵路
冷落寒溪舊釣簑

郢署梅開寒階飛雪
友人焦鶴亭正客江夏作此

奉懷

武昌應有梅如雪
郢地驚看雪似梅
黃鶴樓中千里客
青楓浦上片帆來
蘭棹桂楫遙相憶
郢渚江城且未回
我亦旅愁憔悴甚
何時握手一啣杯
珠履雲裘玉不如
壯遊歸路太踟躕
晴川樓閣登臨處
大別洪濤入夢餘
繡被誰同青雀舫
旅人久厭武昌魚
朔風江上吹楊柳
蕭瑟驚心逼歲除
不是離憂行路難
經旬誰共勸加餐
清霜鐵笛愁中聽
斷岍銀沙雪後看
鸚鵡州邊衰草遠
漢陽樹裏暮江寒
尤憐歲晚梅花發
惆悵懷人正倚欄

寄題黃鶴樓

余在郢中焦鶴亭遊武昌作此寄題

西風浩浩下寒洲
獨立層霄最上頭
黃鶴高飛楚天外
白雲低拂漢江流
危樓長笛梅花曲
夾岍晴沙錦樹秋
此日幽人耽勝地
烟波停畔共悠悠

翠鬘仙人下杳冥
馭風萬里走羣靈
登樓天末江光白
駕鶴雲中劍氣青
一曲霓裳聞玉笛
九霄風露上金庭
獨憐芳草汀洲畔
碧血銷沉處士星

黃鶴仙翁天一涯
高城樓閣俯紅霞
鳳凰山下舟橫渡
鸚鵡洲邊雁弄沙
漢口烟波三澗水
武昌楊柳萬人家
何當載酒磯頭極
目晴川落日斜

黃鶴磯邊暮靄收
凭高西望洞庭秋
城隅已合三江水

天際常懸萬里流投簡尙傳鸚鵡賦當杯應典鸚鵡裘
他時歸客談遊興笑解囊青翰舟

長至節憶家

中秋猶記出柴荆長至忽看歲序更千里記程江路遠
五紋弱線旅魂驚懷鄉不共歸雲去作客真如落葉輕
玉瑄葭灰吹不定陽春臺畔雪花明
愁隨一線一陽生日盡西南落照明馬首何時瞻北道
貂裘今已敝南荆寒天雪影時侵戶靜夜江聲暗入城
獨有梅花知客意漢臯開遍慰幽情

何事

何事飄零傍楚宮不堪回首海雲東醒時作客仍天畔
愁裏還家是夢中江上青山遮路斷鏡中華髮嘆途窮
故園兒女椒盤會只少南天一老翁

明世宗修予詩

十首。賜方士邵元節號
致一真人命分獻靈壇爲建仙源
宮于其家。郢至載世
宗爲純一道人再生

致一真人迥絕倫靈壇分獻奉明禋仙源自握黃金印
丞相猶冠香葉巾已見瑞芝來別殿還求紅玉禮羣神
更聞禱祀前星耀玉燕承恩賜近臣

仙都琪樹本青葱問道常依河上公白鶴遶壇爭極殿
紅雲捧日靜輪宮玉杯豈識垣平詐蓬島難從五利通

六十年來真一瞬桑田滄海變東風

彤闈下詔掖門松羽客從來晉秩宗階下光浮青玉爵

壇前雲護紫泥封每焚金錄當三殿道有鸞輿駕六龍

漢武秦皇俱寂寞漫勞徐士走艤艫方士邵元節陶仲文皆加銜禮部尙

書

通天臺上望悠悠勝勢常連井榦樓天子鶴衣香在手

公卿羽服月當頭羅峰將順同王旦寇準逢時似桂洲

豈有仙人靈樂在文成當日列通候邵陶皆封伯末句及之

紫府仙人駕彩虹雷壇霹靂走豐隆龍圖龜範重華殿

翠羽金枝萬壽宮靈素登階傳秘錄軒黃問道向崆峒

獨憐折檻朱雲苦十載消沉詔獄中

五城隱隱彩雲端浪說先天玉粉丸坐見綏桃來御幄

又傳瑞鹿進雕欄雷霆光動仙人掌風雨寒生太乙壇

千古茂陵煙草歇雲中依舊下青鸞先天玉粉丸煉鉛為之方士胡大順

所獻後與藍田玉同伏誅

青童只在海雲東誰向南華問大鴻御輅久停恭默屋

天書真降玉清宮風飄金檢丹青外雨灑靈壇輦路中

賴有神威清塞曲推恩先拜贊玄功

景陵白鵲亦逍遙御苑神龜出海潮萬壽帝君膺寶冊

一陽真宰降神霄迎鸞慣作青陽曲裂石常鳴碧玉簫

召鶴靈符今尚在相臣新進紫宸朝

帝自號曰萬壽帝君又曰一陽真人

。嚴分宜罷相進召鶴符

金丹繹絡奉宸居白兔行行入禁廬紫極仙翁招瑞鶴

神霄高士佩銀魚三花樹裏宣真誥五色雲中唱步虛

若使安期今尚在何妨同駕赤鸞車

帝別號紫極仙翁陶仲文初授神霄

高士

禹步星冠對碧空集靈臺上月朦朧築壇髣髴祈年觀

醮籙遙來永壽宮楚國金枝光燦燦顯陵丹露夜濛濛

君王夢入清虛府侍女霓裳劍佩同

郢中雜詩 五首

江干一望遠連天百折洪流嘆逝川下里巴人來郢路

漢臯神女步芝田澤收菱芡家家市戶有魚蝦處處船

却向石城勞極目洞庭南去正無邊

肅皇當日幸江濱畫錦歸來玉輦移過沛大酺天上樂

享陵歌舞郢中兒豈無猛士留雄鎮雅有期門擁翠旗

今日彩雲飛欲盡萬年江漢舊陽池

承天原是舊豐京楚國山川久擅名郢市斑斑青玉笋

漢津細細白魚羹山依樓閣通闌闌樹接江干入郢城

却望東南元佑觀蒼茫瑤闕隱蓬瀛

客城九月雨淋零今日殘冬雪滿庭地近瘴鄉鼠氣紫

江浮煙樹水痕青豪遊鄢郢雙龍劍清絕乾坤一孟亭
放眼瀟湘千里外蕭蕭蘭蕙萎寒汀
荊州物論亦嘈嘈樓上元龍亦足豪木客爲隣迷楚澤
神魚拔浪咽江濤遠遊屈子增長恨別賦江淹悵彩毫
天際真人君不見還從湖海覓吾曹

憶約菴

約菴居士老桑麻憐我羈樓閱歲華孤客有懷驚落葉
片雲無路寄梅花歸歟尙隔三江水去矣終乘萬里槎
何日優遊東郭外與君相對卧烟霞

哀郢詩

八首。屈子九章內有哀郢賦而
明季郢中被流寇禍最酷

石城門外草蕭蕭錦樹千行木葉彫屬和豈堪同下里
詩成聊復寄山魈荒臺誰見陽春曲江遠人來武定橋
欲續九章哀郢賦靈修憔悴薦申椒

同首名區瑞氣凝興都一誌顧中丞荒原野火樊姬墓
衰草空山獻帝陵楚國娥眉工諫獵殷邦嘉靖兆重興
我來欲做湘中記兀自因循病未能

顧璘華玉奉詔作
興都誌。先是正

德末平苗碑有嘉靖殷
邦之識已而世宗卽位

當日妖氛徧楚天戰場蹂躪野無煙孤城赤地一千里
三戶凋傷六十年休養漸看元氣復循良端賴有司賢
邇來生聚知多少尙覺遺黎未息肩

大將南征盡獸奔守臣刎頸答君恩氣凌河朔常山舌

死障江淮睢水魂賴有三忠殉社稷尙留孤憤在中原

春蘭秋菊常無絕欲藉椒漿弔郢門崇禎癸未宋一鶴撫楚與留守沈壽

崇鍾祥令蕭漢三人盡節郢城

國殤讀罷九歌終當日烽煙舊沛豐萬隊雕戈拋粵甲

幾人長劍帶秦弓遺民郢路悲燐火山鬼蘭臺嘯烈風

惆悵名都尙簫瑟村虛落落野原空

豸繡無靈偃漢旌隴西門第辱家聲投戈自附潢池派

屈節猶狗郢上城幸有風雷鳴地軸免令隨道走長鯨

何如血染中丞商巷戰捐軀宋宛平時李御史守顯陵先降賊以與賊同

姓甚自得往說守郢宋中丞不從城破宋巷戰死如唐之盧中丞澄

矯首風塵數十年當時戎馬暗南天燎原煥火黃巾隊

避寇艤艫下瀨船此地尙餘三義傳至今猶說七哀篇

從來荆楚稱形勝昔日兵戈亦可憐

郢都湯沐帶陵陂烈烈英魂不可追養士百年存大節

同心一死見雄姿果卿裹血揮戈日許遠從容就義時

猶有當年沈留守捐軀報國更無疑

郢署梅開

爾是孤山玉樹叢濕雲如黛夜濛濛江天梅信催霜早

臘月花開細雨中空憶三千餘驛路已沾二十四番風

隴頭况有他鄉客欲折南枝寄海東

盼家書不至

客心豈是憺忘歸頓覺從前計盡非雙鯉不來愁欲絕
孤雲無定欲何依人來江國隣清漢夢到家山入翠微
安得凌空騎鶴去憑高北逐塞鴻飛
雨雪關山恨未歸行人何日叩柴扉平安字在書難寄
骨肉情深願尙違南去衡陽知不遠北來鴻雁自應稀
願爲八翼雙黃鵠海曲終朝自在飛

浪遊

浪遊久背故園林萍迹悠悠付漢陰客裏加餐翻善病
愁來無計可調心鄉關似比楚雲遠離夢寧知江水深
慚愧五旬無白髮邇來蓬鬢漸相侵

旅况

下里詹詹屬和遲看他郢曲了無奇苦吟每在思歸後
抱恨偏多令節時班馬未從真北路梅花空折向南枝
殷勤爲問雲中鴈千里書來好寄誰

經時不見舊漁磯家在城南綠樹圍夢裏關山無險阻
客中肌骨耐寒威酡顏醉卧梅花帳霜月初更白苧衣
好待明年春色動隨陽一逐北鴻歸

旅懷

刻羽何能更引商多情宋玉惱襄王海隅明月風塵隔
夢裏梅花驛路長力欲破愁常病酒老能祛慾尙懷鄉
九歌歌罷思公子獨立清宵亦斷腸

寫懷

曲水池邊木葉秋楚天漠漠曉雲浮清江遠隔般溪渚
白雲難同故國樓借夢還家迷枕畔驅愁暫去上眉頭
荆門郢樹知何極腸斷西風畫鷁舟

羈愁

遙來澤國近滄浪解佩難從天一方作客漫憑三寸舌
思家欲斷九迴腸漢江水涸魚龍隱楚岫雲昏雨雪涼

非爲羈愁詩意懶郢中絕調久淪亾

齊僖

自嘆齊僖路欲窮淒迷南北似飄蓬異鄉勝地尤多感
作客愁城未易攻楚國人烟橫碧落漢江雨雪散空濛
何堪歲晚蕭條甚却共巴人寄郢中

江天

江天病葉亂飄颻愁絕靈均不可招郢路梅花和雪瘦
蘭臺朔氣助風驕南來碧漢家逾遠北阻黃河路尙遙
賴有石城千斛酒老夫紅暈臉生潮

旅感

莫道他鄉行路難時從異地勸加餐炎方日近冬常暖
水國陰多晚易寒旅况三秋無尺素夢中兩字報平安
淒淒雨雪生離恨縱欲遣歸已歲蘭

旅夜

風塵旅况亦勞勞衰鬢蓬鬆笑二毛客裏壓絲餘杲著
夢回鍾漏響蒲牢簷垂河漢殘星落雪霽梅花片月高
名士風流非我輩但須痛飲讀離騷

楚國重重望裏長石城城畔月蒼涼三冬永夜增離恨
萬里愁心是異鄉漢渚梅花當戶碧江樓橘柚帶雲黃
無端更讀文通賦縱不銷魂亦可傷

卷一